



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Eisdem.

urn:nbn:de:hbz:466:1-20006

bat. Quia verò nobis non constitit de præmissis, causam ipsam discretioni vestræ de assensu partium duximus committendam; per apostolica scripta præcipiendo mandantes quatenus de præfata sententia cognoscentes, si eam inveneritis rationabiliter fuisse prolatam, confirmantes ipsam, faciatis auctoritate nostra remoto appellationis obstaculo firmiter observari. Alioquin ex integro de causa cognoscentes, juxta formam prioris commissionis, quod canonicum fuerit statuatis appellatione remota, cogentes partes per censuram ecclesiasticam &c. Nullis litteris obstantibus præter assensum partium &c. Quòd si omnes &c. duo &c. Dat. Lat. V. Idus Iulij.

ABBATI ET CONVENTUI
de Waltham.

Cum vos & Ecclesia vestra, in qua estis de novæ plantationis origine & assumptione religionis Dei obsequio mancipati, de gratiâ sedis apostolicæ tanquam speciales filij, specialibus merueritis privilegiis honorari, providere volumus ne in his quæ de jure & dudum observata consuetudine obtinetis, injustæ vexationis dispendium subeatis. Ut itaque religio quæ in Ecclesia vestra laudabili noscitur inchoata principio, bonis secundum Deum progressibus amplietur, & vos à matre vestra Ecclesia Romana jura vestra sentiat illibata servari, ad exemplar bonæ memoriæ Celestini Papæ prædecessoris nostri præsentibus litteris vobis duximus indulgendum ne in Ecclesiis ad representationem & ordinationem vestram spectantibus aliqui Clerici, nisi à vobis præsentati fuerint, ordinentur, vel ad earum regimen præter assensum vestram & conniventiam admittantur. Si verò contra hæc ausu temerario aliqui venire præsumperint, & jura vobis debita sibi usurpare tentaverint, factum & præsumptionem eorum viribus carere decernimus, & per vos auctoritate apostolica, qui taliter intrusi fuerint, concedimus amoveri; nisi fortè, quod absit, præsentationem & ordinationem earum constiterit vos malitiosè differre. Nulli ergo &c. indulgentiæ nostræ &c. Datum Laterani III. Nonas Iulij.

E I S D E M.

AD notitiam apostolatus nostri pervenisse noveritis quòd Archidiaconi & officiales eorum contra statuta Lateran. Concilij ad Ecclesias vestras majore quàm debeant numero evectionis accedunt, & aliis eas gravaminibus indebitè opprimentes, ita graves in procurationibus suis existunt, quòd nonnunquam longi temporis victum brevis hora consumat. Eapropter, ne de cetero talia præfati Archidiaconi vel officiales eorum attentare præsumant, ad exemplar bonæ memoriæ Celest. Papæ prædecessoris nostri auctoritate præsentium districtiùs inhibemus. Et si ab hujusmodi gravaminibus non duxerint abstinendum, liceat vobis receptiones, exactiones, & procurationes indebitas denegare. Quòd si propter hoc interdicti vel excommunicationis sententiam in Clericos vel Ecclesias vestras temerè jaculari præsumperint, indulgemus vobis ut eam non teneamini, utpote latam contra sedis apostolicæ statuta, servare. Nulli ergo &c. inhibitionis & indulgentiæ nostræ &c. Datum ut suprâ.

Epist. 117.
De procurationibus immodicis reprimendis.
Vide suprâ lib. 1. epist. 140. & infrâ lib. 10. epist. 88.

E I S D E M.

INCumbit nobis ex debito pastoralis officij &c. usque ad verbum annuimus, & præfatum monasterium, quod specialiter beati Petri juris existit, in quo divino mancipati estis obsequio, sub beati Petri & nostra protectione suscipimus, & præsentis scripti pagina communimus. Libertates præterea & immunitates antiquas & rationabiles consuetudines monasterio vestro per privilegia Romanorum Pontificum & scripta Regum & Principum prævia ratione concessas, & hæcenus observatas, ratas habemus, & eas perpetuis temporibus illibatas permanere sancimus. Decernimus ergo &c. protectionis & concessionis &c. Datum Laterani Nonis Iulij.

Epist. 120.
De confirmatione privilegiorum.

E I S D E M.

FERvor religionis & devotionis vestræ nos movet propensius & inducit ut præter commune debitum petitiones vestras, quæ rationi conveniunt, debeamus libenter admittere & utilitati monasterij vestri, quod ad jurisdictionem beati Petri & nostram specialiter pertinet, pastoralis sollicitudine provide-

Epist. 121.
De eodem argumento.

Ggg ij

Epist. 118.
De assensu partium pro-
tiam.

Epist. 118.
De præsentatione Clericorum.

Epist. 118.
Commissio
lis cognoscere
suff. Epist.
1. Avon. t.
lib. 10. ep.
104. huj.
1. 10. 10.
1. 10. 10.

re. Eapropter &c. usque ad verbum assensu, auctoritate vobis apostolica indulgemus quòd si Episcopi, in quorum dioecesi Ecclesias parochiales habetis, in fata concesserint, & Ecclesias vestras interim vacare contigerit, Capellani in ipsis instituendi, ne ordinationes Ecclesiarum inutiliter differantur, ad præsentationem vestram ab eo qui sede vacante vices Episcopi debet de jure supplere, sine contradictione qualibet admittantur, qui vobis de temporalibus, Episcopis vel eorum officialibus de spiritualibus debeant respondere. Adjicimus etiam, quòd sicut rationabili consilio & providentia Capituli vestri Ecclesiam de Windesores ad cellarium & Ecclesiam de Alrichefeia & Ecclesiam de Herford & Ecclesiam de Nesinges ad vestimenta fratrum vestrorum inveniendâ, Ecclesias verò de Epinges & de Wdesford & de Neclesuvelle & de Luchenton ad usum sacristiæ vestræ de assensu dioecelani Episcopi assignastis, ita vobis vestrisque successoribus in perpetuum permaneant ad hos usus. Et ne impostero hæc assignatio vestra possit vel debeat in aliquo mutilari, ipsam auctoritate apostolica confirmamus & præf. &c. Decernimus ergo &c. concessionis & confirmationis &c. Datum Laterani VI. Idus Julij.

FRATRI RAINERIO,
apostolice sedis Legato.

Epist. 122.
Creat ipsum
Legatum apostolice
sedis in nonnullis
provinciis Gallie
canis.
De fratre Rainerio
vide lib. 1.
epist. 92. 93. 125.
249. 395. 449.

Licet solitæ solitudinis locum affectes, fugans vel fugiens potiùs tumultus secularium potestatum, ut Rachelis fovearis amplexu, & in lege divina jugiter mediteris, sedens secus pedes Domini cum Maria, cum tamen in lege mandatorum ipsius legeris quòd obedientia præferenda sit victimis, & proximum diligere debeas ut te ipsum, nec potes nec debes sic vivere soli tibi ut vel recedas ab obedientia præsentis vel proximorum salutem negligere videaris, sed à contemplatione Mariæ ad actionem Marthæ teneris saltem ex obedientiæ virtute descendere, ut in Lia Rachelis sterilitatem tua prædicatione fecundes, dum quod in solitudinis & claustrii silentio didicisti, juxta mandatum evangelicum prædicaveris super recta, & talenta tibi credita erogaveris ad usuras. Nos autem, qui, licet immeriti, vices ejus tenemus in terris qui discipulis suis officium prædicationis injun-

xit, *Ite*, inquit, *in orbem universum, prædicare Evangelium omni creaturæ*, plenè de tua conscientia & religione confisi, plenè tibi legationis officium per Ebreundensem, Aquensem, Arelatensem, & Narbonensem provincias duximus committendum; corrigendi & statuendi tam in monasteriis quàm aliis Ecclesiis quæ correctione vel institutione cognoveris indigere, audiendi & decidendi vel etiam committendi causas, & absolvendi eos qui ob violentam manuum injectionem in Clericos vinculo sunt excommunicationis astricti, si ex injectione tali vel enormis læsio vel homicidium non fuerit subsecutum, confutandi hæreticos, & cogendi eos redire ad catholicam fidei unitatem, & plenæ legationis officium super his & aliis exequendi, & percellendi pœna canonica contumaces, indulgentes tibi auctoritate apostolica liberam facultatem. Nulli ergo &c. concessionis &c. Datum Laterani IV. Idus Julij.

ARELATEN. ARCHIEPISCOPO
& Suffraganeis ejus.

IS cujus omnes viæ misericordia sunt & veritas testante Psalmista, cujus omnia verba doctrinam sapiunt salutarem, cujus opus exemplum nobis vitæ sanctioris ostendit, licet solo verbo virtutis suæ possit & poterit universa, utpote qui dixit & facta sunt, mandavit & creata sunt, operarios tamen in vineam suam & messem induxit, & præter sacrum duodenarium discipulorum numerum, quibus potestatem ligandi contulit & solvendi, alios septuaginta duos elegit, & binos illos ad prædicandum direxit, indulta eis calcandi super scorpiones & regulos potestate, nobis relinquens exemplum ut vestigia ejus, quantum fragilitas humana permittit, in debita humilitatis devotione sequamur. Hoc sanè apostolica sedes, quæ cunctarum Ecclesiarum à Domino in beato Petro magisterium obtinuit & primum, assidua meditatione revolvens, multos in partem creditæ sollicitudinis evocavit, ut in diversis mundi partibus per eorum præsentiam ipsius absentia suppleretur, & defectum unius multorum relevaret affectus, quorum sollicitudo diligens & sollicita diligentia expeditius in singulis provinciis & eradicaret noxia, & profutura plantaret. Nos etiam, qui, licet immeriti, vicem Christi

Epist. 123.
Vt Rainerium
sedis apostolice
Legatum reverenter
& benigne
tractent.